

四庫全書

集部

欽定四庫全書

集部

海陵集卷

十七至  
二十

詳校官庶吉士臣李如筠

主事臣呂雲棟覆勘

總校官編修臣王燕緒

校對官編修臣盧 遂

謄錄監生臣王爾熙

欽定四庫全書

海陵集卷十七

宋 周麟之 撰

外制

王彥差知金州

朕惟蜀漢諸郡控連山南介於邊衝襟帶深阻二千石以共理之寄無禦侮之事非它州比也必其威重可以彈壓屯戍加之靜治有以拊摩瘡痍自非名將之儔茲

未易以輕畀具官某膽畧忠壯望雄于邊周旋戎攷夙  
有多績武都之治威譽隱然惟茲西城實號方面分虎  
剖符莫如汝宜萬旅連營賴壯猷以為之節制四州接  
壤須善政以為之撫綏尚勵爾能以承予訓

劉章除權工部侍郎

朕簡任儒臣左司起部雖云技巧器械之事不足以煩  
老成至於論思獻納之官茲所以為高選非取充位蓋  
期得人具官某慎重自將純明有守精於史學洞歷載

之數千頃以文科居大廷之第一策名三館去國累年  
須召對於公朝復徧儀於清路守官載筆退唯謹於必  
書銜命抗旌歸更嘉其不辱甄此多績畀之貳卿夫舜  
命共工序乃先於降典而周分事典制皆備於考工爾  
為多聞必達古意往祇予命尚遠乃猷

路彬除刑部郎官

朕擇吉人以觀于五刑之中惟時秋官實掌邦禁郎吏  
之選非才莫居以爾法理詳明輔之文雅擢在棘路逾

三十年自評而丞一再為正又嘗五易憲車于外轍環於湖廣江漢之郊茲圖老成入踐省戶使汝持議之際不減平反之時斯為祥刑朕不多告

胡棣除兵部郎官

朕耀德以為威安民以為武任賢以為折衝之具戎部雖設殆同清曹握蘭者優游乎其間非老成謹厚之士不畀也以爾業履純茂多所踐更自蜀趨朝贊事外府久攝承于夏官之屬爰嘉乃績就命為真惟立武之常

規與除我之大戒載在古訓其儒者不能知之往思悉心以助而長

周綰除吏部侍郎

諸老並用足為在位之光貳卿分曹無若無銓之劇疇膺寵命允屬耆英具官某局度方嚴性資敏達素官于外踐更帥守之官晚躋于朝躡寘師儒之長多士得所矜式斯文賴其作成念齒及於彌高豈官遷之可後朕觀其有考藝之識而知鑒裁之密取其有厲賢之效而

見品覈之精協彼僉言升于選部爾其痛懲姦吏之弊使吏畏而不欺恪遵成法之嚴使法行而無壅往熙乃績毋易吾言

陳正同除敷文閣待制樞密院都承旨

右府本兵之地惟長貳總秉諸事為朕腹心若時屬僚寄委咸重奉承密命必用從臣闕而不除十數年于茲矣朕今得世濟之彥拔其才而用之具官某直亮多聞得於家學持論据正亦克似之賜環來歸既陟汝于禁

路無寓幾直罔不惟職業之思朕方櫜弓戢戈以常德  
立武事如爾明慎允宜在廷內閣陞華鴻樞稟務併以  
授汝往其欽哉

楊揆除權刑部侍郎

朕以大中之法輔常教惟四方典獄懼弗簡孚司寇詰  
姦實總斯事故自昔貳卿之選多以練習文法久于廷  
尉者為之比所謂因能而任官者也具官某朴茂有守  
罔拘繫于法家之科停疑決平不失古義久在棘路精

明多通憲曹既虛無以易汝朕欲剔決滯訟申理寃民  
痛懲鍛鍊之吏爾能深體朕意恪修厥官期于無刑斯  
曰稱職

湯允恭除權兵部侍郎

今東南士大夫任于蜀者或受命而往或迷職而歸朕  
未嘗不別其才能而盡器使之方旌其勞閱而制序遷  
之等凡所寵勵同于勸功具官某廩慤自將不為表襮  
約已厚下所臨有聲自抗旌於井絡之郊固已三易軹

傳七更歲華猛吏興而爾政平貪人敗而爾節見成效  
卓著亟賜之環延見昕朝軫其勤瘁授以簪索列之司  
戎夫成周之隆兵寢不用然猶命大司馬以九伐之法  
正邦國是則經武之備固不可以無事而廢也其體朕  
意益殫乃心

林安宅除廣東運判李植除湖北運判

凡觀風察俗之吏輶車所至通號外臺惟時寄委尤重  
況番禺當百粵之會荆楚據重湖之封地遠寄深所當

遴選今爾安宅儒科之舊而優於吏能爾植吏道之良而本以儒術有此二者付之六條庶幾乎孚惠于列城用稱朕愛民之意

李琳除敦文閣待制知湖州

天下之勢猶持衡善為治者扶其偏而已惟中外一體重輕適中故漢選守相之良入備公卿之缺而當時廷臣亦兼使治郡如汲黯以九卿補外蕭望之繇諫大夫出守平原用斯道也朕比下明詔固欲踵前轍而行之

具官某豈弟愛人得于天性與物無忤中實敢為至其  
遇事激昂每思有以自見典銓歲久士論稱之以身為  
民蓋汝本志雖朝廷重於失老成之彥而郡邑急於得  
慈惠之師矧是雪川今為近輔寬政之後弊亦良多爾  
其深懲吏姦勿使滋蔓首知民害毋令敗羣列職西清  
仍班從橐帝城不遠治績易聞宣布之餘尚厘猷告

許尹李莫並除直祕閣

石渠天閣之祕今使司外臺制邊閫者亦得寓直於其

間非功著而職修未易以斯寵畀也朕惟尹之按蜀部  
茶課辦而馬式明莫之帥瀘川疆事靖而封守固此兩  
人在萬里外而政事之美藹然有聞士大夫自西南來  
皆可訪而得也故予並命以職使偷分吾東壁之光雖  
然朕深軫遐方亦嘗究其利病蜀中諸郡地陜民貧惟  
茗者額屢增而園戶不能支爾尹當圖其裕瀘南劇邊  
地控夷落興寨者事煩擾則蠻人何所賴爾莫必謹其  
防各勉來勤以綏後渥

胡彥國除直祕閣知潼川府

蜀郡五十四而會府為雄藩考近時師帥之賢朕猶能  
志其一二昔爾兄以達材瞻智屏蔽西南保全一方卧  
護諸將功大名顯其民卒皆有甘棠之思餘烈未泯厥  
心慨想今梓潼關守尚當求其類而用之以爾敏辨無  
人世名不隕政事方畧似其哲兄三歷專城所居民富  
徙帥淮右瘡痍日蘇迹其所臨靜治弗擾愛民則甚寬  
而不弛奉法則雖嚴而不苛與其跼近地而累事功莫

若付遠民而分憂顧劔東重地命汝往焉內閣高華更  
加寓直旌麾所嚮誠可以慰蜀父老之心少須政成嗣  
有褒寵

王之望除直祕閣成都府運副

蜀漕重寄也而成都一路地尤遠於本朝事最叢於諸  
部以言乎財賦則列城千數利入浩繁大計斡旋所關  
者版曹之務以言乎差注則人物之淵調官輻輳名籍  
升降又無乎銓部之權自非器識卓然過人未易以稱

斯選也爾學富才瞻號為通儒見于吏能每有可紀攬  
轡夔梓教條具孚今徒劔西朕不它告惟是均節調度  
之過痛懲選授之私則軍儲贍而民氣紓官簿正而吏  
姦戢爾尚悉力副予丁寧

鄧祚除廣西運判

張官寘吏凡以為民雖內外遠近有不同要皆欲相為  
表裏惟朝廷無外輕之弊則士大夫忘遠官之勞勢蓋然  
也爾以才諳茂揚于仕途惟其久在州縣間故能練達

民事今既召見而遽以使指授之豈不思與賢者相近哉知爾有使者之才適應朕詔耳矧惟廣右僻在海陬頃嘗貳于桂林固已稔其風俗將漕一路實惟汝宜勿徐其驅往諭德意

林栗除太學正

養天下之士而作成其行藝藝非訓導不精行非糾率不成二者固有別也以爾聞譽之美在類有聞種學績文用意近古茲命名對陞之膠庠惟學規之是司乃士

行之所繫往帥以正則予汝嘉

榮蒞除權兵部侍郎

貳卿分治蓋同於為禁從之華六職異宜當有以寬老  
成之責爰更譽命曲示優恩具官某蚤以才稱周于世  
用自先朝擢之列監已席顯融及往歲事朕潛藩益加  
親信既久勤於外寄方進隸於中臺念版曹之浩繁必  
財豐乃能裕于用雖心計之精敏當病間豈可躬其勞  
惟時司戎俾爾易地事斯清簡庶幾剖決之無難身或

便安豈較班行之少屈往祇厥敎用副予衷

湯允恭除權戶部侍郎

朕用人之長蓋將以式序在位分職而治亦幾乎各安  
所施惟時詳練之才宜服浩繁之寄具官某抱能膚敏  
秉志篤誠嘗于學古之餘達是理財之要總賦全蜀深  
得遠民之心司鈞大農博知當世之利洎賜環而入覲  
即持橐以外班念當橐弓矢而戢干戈豈武部可施于  
方畧欲使實倉廩而充府庫惟版曹正賴于幹旋雖邦

用之耗登靡常然民財之取予有制若其魚足上下在爾審調盈虛往懋宿官之勞益據富國之策

向伯奮除湖北提刑

人異于器惟舊是求吏能其官以久而習先王之任羣才用斯道也爾之為部使者幾三十年矣六條問事每形于議論之餘行部精明駐車決遣平日閱歷數路風采凜然可觀比自臺郎出為郡守謂斂惠千里誠不足以展其長重湖奧區庶獄重寄茲予命爾攬轡造驅往

思澄清毋損而譽

余時言除國子監簿

國家闈設賢闈作成士類錄其行藝歲有籍焉而簿書之官與典斯事是亦清選也以爾儒蘊之茂見推士林名對之初陞于監屬益思自厲往祇厥官

莫伯虛除刑部郎官

朕忱念庶獄救寧嘉師其斷治既屬之理官例成又聽于司寇郎曹所領責任匪輕爾以明允之資通法理之

事周旋棘寺踐歷三官是必能習察獄之麗知播刑之  
迪者俾升憲部用展爾長決讞則詳審其重輕理寃則  
深求其情偽爾無俟訓尚慎之哉

楊邦弼陳俊卿並除著作郎

史有三長才學識世罕兼之昔人嘗以是為篤論矣才  
不勝則僂學不充則殆識不卓則膠三者具而用之無  
不宜焉豈唯史哉今東觀司當代之簡策史也纂祖宗  
之謨訓亦史也而爾邦弼以閔奭之度見于用爾俊卿

以清約之守形于文參訂編摩皆已逾歲觀其所蘊可  
以推其長茲命序升俾專譔著雖所仍者凡例之舊而  
所謹者筆削之公益盡乃心以恢遠業

曾幾除權禮部侍郎

人求其舊貴老所以敦士風禮教之中得賢可以正王  
度孰贊神人之治咸推德齒之尊具官某早以時髦策  
偉名晚以壽俊儀清路弟兄騰翥昔多持橐之聯中外  
踐揚今作登瀛之冠圖籍皆其舊見典章無不周知朕

念老者安之固難以筋力為禮而賢才若此亦欲其身  
名俱榮乃擢貳卿用陪宗伯顧欽柴之甚邇資掌禮之  
惟寅廣所學足以究上儀清其心足以相熙事勉哉無  
懈時乃之休

李莊除兩浙運判樓璣除淮南運判

朕惟東南諸路號財賦之淵淮浙近區當轉輸之要矧  
若吳會行都在焉調度浩繁欲助邦計必濟之以彊敏  
之才自江以北土曠人稀歲租未復欲紓民力必處之

以寬和之政蓋不止薦劾郡吏觀納風謠以六條察州而已也今莊以才選領二浙之權璫以政稱漕兩淮之粟庶乎其適朕意矣各思舉職以稱獎知

知潼川府沈該差知夔州

寧江巨鎮地控三巴分閩之臣額制一道朕觀兩蜀二千石有治理效者因以虎符畀之從民望也具官某以西清之舊出典藩維梓潼之民實受其惠三年報政命徙于夔地近則教自乎俗同則政不易利之所及者廣

才之所試者周究爾遠圖荷吾劇寄

御史中丞宋樸兼侍講

朕昕朝之暇躬御邇英樂延名儒敷繹古藝預斯選者  
名實欲其稱也故職在侍從則當以勸講之官待之具  
官某造道自得尤邃于經頃居殿中即以三聖精微之  
義為予誦說又辭象旨有發予衷今由臺端位中執法  
則是吾持橐之臣也宜陞講席用正班聯益殫所聞成  
予典學之美

王珣除湖南提舉

國家以倉儲之利斂散邦財以林鹽之饒阜通貨政立為成憲具在有司外臺總之非才莫濟爾之使浙右也銳於集事備著能聲今按湖湘詎勞餘刃地無遠近也事無劇易也一路之寄其重則均毋過於立威毋慢於奉法政成民聽朕不汝忘

趙子厚依舊直祕閣知饒州

寓祕府之直秉專城之度非才具之素優難寵名之兼

畀以爾吏資彊敏儒蘊邃深外擁使輶能恪司於庶獄  
入我朝弁當克壯於宗盟其仍內閣之華往服左符之  
寄尚圖勉勵以究蕃宣

賈直清除江西提刑吳傳除江東提刑

朕以大中之法輔常教四方司政懼弗簡孚分道置臺  
屬之綱領我有成命非明刺史孰能將之以爾直清雅  
吏之才長于折獄以爾傳望郎之俊亦屢按刑爰稽厥  
勞更授使指惟爾所部介于大江東西連城攬轡在望

使歡謠美政相聞乎二境之間不其休哉

陳相除左司郎官

中臺本天下之政六職治其繁而都司總其要典領至  
重在乎得人以爾邃雅而文達于世用司我輿駕舊為  
望郎贊謀樞廷再踐厥屬識慮精審備見于斯肆以汝  
遷升于宰掾惟慎密足以彌綸省闈惟詳整足以糾正  
諸曹爾所優為奚俟予訓

齊旦除樞密院檢詳文字

朕以樞機之地實筦萬微簡任屬僚參裨密畫非素以  
詳慎自處者烏能稱斯選哉爾沈邃之資操尚端慤周  
旋省戶蒞事有數馬之恭俾以才陞列之右府惟審固  
足以協運籌之餘議惟精勤足以考經武之舊規茲爾  
所長往哉毋懈

江西運判盧奎利州路提刑路彬潼川府路提刑  
劉瓌並令再任

漢名臣嘗以數易長吏為戒一許丞猶善助之矧奏詔

條行郡國察二千石之治狀而才效卓著者乎今奎以  
心計漕邦儲江右之民其用裕彬以儒術飾吏事漢中  
諸郡其刑清壞以明恕按獄成劔南以東其訟理秩滿  
而去人斯難之美以久而成善必累而進再蒞所部毋  
墮厥勤

海陵集卷十七

欽定四庫全書

海陵集卷十八

宋 周麟之 撰

外制

宋 裴除太府少卿

漢以二千石高第入備九卿之缺是不惟旌賢勸功而已亦所以均壹內外廣用人之路也朕率此道訓迪厥官以爾字敏有才裕于心計比由使指往布藩條淮海

之民服習其政今也褒表治效賜環而歸惟外府貨財  
之劇司而少列朝廷之顯位頃嘗攝事因任則宜往其  
欽承益懋來績可

李庚除兵部郎官

文昌列曹雖受察于御史府然郎官著位實居六察之  
右或自臺而升省或由省以入臺二者均謂之遷惟才  
無所不可矣爾器範清穎士之譽髦敏於事為果達而  
濟頃以公薦序于憲僚既升三院之聯彌聳一時之望

輟自我豸界之握蘭時方弭兵戎政簡矣若夫正邦之  
大法立武之常經職在司存有不可廢昔之所察今之  
所為委任不殊往其懋勉可

褚籍除工部郎官

朕用人之方惟器是適謂賢者不可以職拘也苟才有  
餘地必使之踐更于臺省之間以爾質直而文心貌俱  
古蓋一鄉之所謂善士在時論亦以為通儒回翔臺僚  
既已久矣序于郎吏孰曰不宜夫三院之聯六曹之屬

皆華選也惟前日之察人與今日之察于人為少異耳其事雖異其理則同毋謂次遷不厘于績可

趙沂除夔路運判

蜀道有四夔當其衝雖飛輓粟芻不至輦下然九郡四軍監皆總于外臺其任固不輕也爾能以儒術施之于政事之間劍南以東蓋其鄉國剖符之地適在鄰邦宜付輅車起臨近部凡六條之所問不三令而自孚爾皆習知奚俟予訓可

宋之才除知衢州

朕惠綏元元若保赤子每思得忠信慈惠之吏相與悉力拊摩之庶使斯民安于田里求諸侍從之舊莫如已試之良具官某學醇行方聲中其實潔已蒞政風猷可觀頃嘗為成均之師貳宗伯之事迨分符于閩粵俄引疾而丐閒今其有瘳可以共理三衢劇郡物夥俗繁政中和而化乃成治清淨而民自定往勤宣布益懋汝能

可

鄭知剛除太府寺丞歐陽當世除軍器監簿

寺監設官無非公選外府總領貨貝監飭五材屬僚得人亦克有濟今知剛以老儒而練世務序之宗正則不足以展其能當世以名閥而有典刑委之糧儲亦未足以見諸用揆于列位爰俾次升夫出內邦財頒受之惟謹繕修武備鉤稽之必精各思悉心往助而長可

黃應南差江西提刑

修潔之士以行誼見信于人果若白璧之不能污也惟

毀譽得其真則忠邪為之判公論所在較然可知爾以  
清恪廉介之資蓋嘗為吾御史矣剖符江右風槩不衰  
乃傷於讒坐免而去今焉暴白清望益高復畀輶車按  
刑舊部是必能使獄訟衰息鑄頑成仁六條素孚矣俟  
予訓可

李若川除江西運判

部刺史按行一路通號外臺惟時轉輸寄委尤重是必  
識朝廷之德意知財賦之本源使于四方乃克有濟以

爾材具通敏見于踐更頃固嘗鉤稽大農贊治外府以  
司金為版曹之屬今也乘軺江右實總貲儲爰因其能  
就畀漕節茲所謂識德意而知本源者豈不曰得人乎  
哉益究乃心以孚大惠可

王揚英除成都府路運判

吾甚愛民而憂其憂德之所施遐邇一也矧如蜀道邈  
在西南而益之奧區距朝廷尤為遠甚朕屢下寬令以  
紓其民念風謠無以周知恐疾苦不能自達當此重寄

實惟漕司今爾以臺閣之良承流支郡靜治弗擾人咸  
安之就升輶車蓋無若汝之便者夫繁于科調則民力  
屈過為蠲復則官用虧上下之間要能兼足蜀之大計  
莫急于斯往圖爾功庶或有濟可

李如岡差知襄陽府

襄州古重鎮也山川帶紆直接宛洛跨對南夏號鄢郢  
北門當承平時為畿右之一都會迨茲近歲疆瑣繫焉  
創殘之餘田閭耗矣若時命帥固當以寬厚為之先爾

頃居從班見謂長者賦政于外未嘗求赫赫之名朕以其習知民情多歷吏事持重可倚今更以覘首之符畀之夫民安則復歸事簡則易治封守固而邊不聳農桑勸而利自興往須政成朕不遐棄可

徐康除浙西提刑

部刺史奉詔條于外論其職則不一較其才則不同然職之不一一於修才之不同同於用夫欲一其所不一莫若衆職之踐更同其所不同莫若通材之兼濟朕之

所以命康者由此豈無意哉康相家也嗜學而多聞宿  
官而可績將輸湖外厥職既修今以憲車徙于近甸蓋  
將試之于不一之地而考其職處之于不同之間而觀  
其材汝往欽哉惟刑之恤可

羅孝芬除直秘閣湖北運判

今賢人在上引其類而聚于朝豈徒取充位而已哉以  
德進者觀其行事舉者考其能以言揚者究其蘊皆  
將有所試也爾之孝行著于鄉閭稱于士大夫達于朝

廷之上求之此三者為之冠矣丞于中秘觀其行也命  
之察州尊其德也賁之華閣寵其行也夫有德者必惠  
惠可以阜俗有德者必威威可以戢姦中外不殊貴乎  
行志邦國若否尚其明之可

續感除潼川府路運判

國家分道置臺俾司邦賦惟時護漕之任難以給饋餉  
為功然而一路之民休戚攸繫布朝廷之德意觀郡邑  
之風謠若職之先尤在于此爾頃以才諳薦用于朝為

吾名郎出入省戶則德意之所在無不周知剖符蜀中  
舊號能吏則風謠之所聞必嘗熟究有此二者付之輶  
車是將以銓曹之鑒裁甄別羣吏以治郡之風采按臨  
列城往圖爾功庶寬予顧可

李如岡改差知靜江府

聖人之愛民莫大乎同仁一視臣子之事上豈辭乎宣  
力四方均曰帥藩何嫌改命以爾持橐之舊剖符之良  
於獻納論思之時知德意敷宣之本再歷鉅鎮撫吾嘉

師雖延年不進于治功未能逃責而嚴助願圖于計最不可廢才分頽峴首之符復易桂林之節邈彼都會介于海陬惟靜慎足以寧爾邦惟綏懷足以固吾圉往懋厥績式孚于休可

徐度除江東運判

漢制部刺史以六條問事二千石有不奉詔書侵漁百姓蔽賢寵頑皆得以按治今朕選用則必擇二千石之良者為之蓋以其自治然後能治人焉耳爾之在滁也

勞農勸穡拊摩創夷里閭晏然民狎于野可謂治矣今  
付之以一路之寄使推所以自治者而治人則列城向  
風靡然胥效庸有不治者乎往其勸功毋怠而守可

鄭知剛除浙東提舉吳燾除淮東提舉

朕勵精圖治思所以裕民足國未嘗不謹貨儲均力後  
修貨政合是三者付之于刺舉之臣責任顧不重哉况  
夫浙江以東物產饒富而知剛司府之官也敏達可以  
堪其事淮服之左利入浩繁而燾屬城之守也疏通可

以効其能或趣駕於中都或就升於所部惟民情之是究惟國計之是圖各思悉心往諭朕指可

陳機復直祕閣知衢州

賞勉罰偷而吏治舉記功忘過而君恩孚既共理之得人宜疏榮之有典以爾賦資敏効為政寬明向領藩符嘗顯褒於善狀近分漕節亦具著於成勞眷三衢之衝實為二浙之劇以盤錯之難治致蕃宣之久虛茲煩屢試之才併復已鐫之職雖使車少駐欽大惠于一州然

郡紱增華綴榮名于三館往祗茂渥益奮嘉庸可

孟處義除淮南運判

兩淮之地自休兵以來歲寬田租屢下優詔蓋深欲拊  
摩凋郡墾闢曠土招徠失業之民迄今十餘年猶懼實  
惠之未孚也故每命部刺史必求諸二千石之良爾以  
通儒長于吏治輶傳相繼再臨乎淮壩之東茲分守符  
實舊所隸今付漕臺之節俾易部以察州既德意之周  
知亦教條之習熟尚懋乃績副予褒遷可

蘇欽除利州路運判

朕惠顧全蜀欲紓其民故每擇帥守漕臣必用東南士大夫之賢者然四路財賦條目至繁非深知其本末源流未易以外臺處也以爾詳練精敏久分符于巴漢之間凡刺部之規條屬城之會計民之利病吏之惰勤稔于見聞蓋無不迎刃而解就畀輶傳莫如汝宜夫裕民之方非所以示虛文也往圖實惠用副予衷可

鄭知剛除宗正寺簿

君子求為可知而不求於必知則其知之也孰禦夫已  
有可知則鳴臯之鶴雖在陰而子和必人之知則夜光  
之璧或投暗而人疑理蓋然也爾以成德之彥白首于  
州縣間所行所為無非可知者而未嘗求人之必知也  
今薦者以聞于朕特召見而褒進之序于司宗列在寺  
屬其品高矣朕將以是為甄耀之階可

湯圻除江西運判

朕愛民必求實惠立法不為虛文謂民財未豐必先圖

裕民之政而法令雖具不若得奉法之臣凡曰計臺每  
加遴選以爾持介潔於莅事之地孰若責近效於鑄頑  
之區若乃檢梃吏姦耘鋤邦蠹害民者必去撓法者必  
繩爾所優為朕不多告可

唐堯封除軍器監簿

君子學所以為己仕所以行義己欲不輕售義欲不苟  
求知此二者而能介然守之不移焉信乎其為君子儒  
也朕開薦賢之路因欲得斯人者而甄用之今舉者稱

爾志操廉靜為郡學官二十餘年未嘗干進也有守如此無愧乎仕學之道矣肆命召對寘之周行戎監鉤稽姑為之兆益充所養以副吾考擇之詳可

路彬除直祕閣利路提刑

朕夙興夜寐勤勞天下惟懼民力有困乏而上無由知也故深詔執事俾部使者若郡守結軌歸報必以民事為言庶幾有輔不逮今爾彬還自廣部首以二州所病開吾聰明且遠民何知久困悉索而矯虔吏又或乘勢

以侵之非爾之言吾不得亟下寬令也寓直祕府按刑  
山西茲為獎知益勵欽恤可

符行中除太府少卿四川總領

三十年而制用有國之所先一千里而餽糧昔人以為  
病眷惟巴蜀地錯夷民黎元阜而吏絕征求屯戍閒而  
人無飛輓欲安靖而不擾宜總領之得宜爾器識並高  
文才兼贍屢拜繡衣之膚使嘗為粉闈之望郎往副司  
府之卿聯俾隸外臺之軍賦服我休命益務遠圖可

正任承宣使士洪士燠諳各轉官

周道中興歌棠棣而憫族親之缺漢圖紹復詔尚書而加宗室之封朕寅御昌期載披屬籍念近支之在列者有幾而寵數或曠年而不加爰詔司宗大明陟典具官某樂于為善慶亦有餘侃然信厚之風實我神明之胄肆茲敦敘俾以次陞其進位于承流式增隆于磐石益圖令聞用稱殊恩可

蘇粵奉使回轉官

朕惟民不見兵實係兩朝之好臣能承命有嘉四牡之  
歸矧以署行異于歲聘念久稽乎信賞茲何靳於褒遷  
具官某以慎密持身以恭勤奉上夙揚令問服在宸闈  
鳴佩肅然致九儀之有辨抗旃屢矣忘六轡之為勞比  
專飭於使駢復與修于鄰睦既還舊著宜賁新榮服我  
光華之恩益肩志節之守可

楊傑進韻畧補特轉一官

士大夫能力學不倦游心乎藝文之間則隨所得之淺

深必有可觀者自國朝以詩賦取士而審音用字有司之律為尤嚴爾能博覽羣書補綴漏逸參訂習傳之誤奏篇來上論者美之以其稽考精而援據詳也升秩示勸責之身章尚尊所聞勉為致遠之器可

安定郡王令矜轉承宣使

紹封僖爵既承率祖之休稽閱序年具載司宗之法念涉明之有典矧立愛之自親宜舉遷科用頒寵數具官某望高族老德協宗英志自篤於清修身不渝其素履

服僚官寺嘗更貳事之勞賦政侯方累上牧民之最晚  
膺世襲洵易朝班在高帝之子孫齒獨尊於祭酒為漢  
家之藩輔位克繼於苴茅比參考課之公難廢懋官之  
渥俾增榮於使範遂陞亞於節旌尚慎乃猷毋忘予睦  
可

權禮部侍郎賀允中磨勘轉官

三載考績古制也夫以舜之命九官臯陶稷契之勵翼  
其上猶不廢陟明之典此國家所率前憲優從臣其法

不與庶僚等者豈非以亮天工之意待之歟具官某學  
成行尊夙有高致顓俊之始幡然來歸凡所居官皆夷  
夔禮樂之事而能夙夜祗慎惟寅與和比稽歲勞實應  
功令夫閔閔自爾積而名器非吾私姑以序升往俟殊  
寵可

王侯轉一官

修進貢舉  
條法推恩

國家取人以三歲之科定令為一王之法比嚴公選釐  
正弊端纂成新書昭示丕則惟時侍從之雋實典編摩

之司具官某年耆學明器博用遠茲迪簡于舊德復延  
登于禁涂職在民曹得古人之心計官兼教省習當代  
之憲章屬大比興賢之年奏中興試藝之法昭若甲令  
無非合古以便今達予乙觀遂可陳經而立紀爰加茂  
實以答成勞往祇寵章益懋熙績可

喬昌時等轉一官 同前推恩

取才斂賢上聖之先務創法垂世太平之懿綱惟予國  
家遵用科目沿襲歲久弊因以滋屬大比以登材髦詔

有司而定憲令爾等皆以充職之舊與茲成書之勞既  
頒賞以有程俾進階而用勸益思忠蓋用稱優恩可

知泉州宋之才磨勘轉官

三載考績舜申命于亮工八柄馭臣周首嚴于頒爵朕  
率是道用訓厥官顧雖侍從之優不廢典彝之舊具官  
某器周于用學邃乎經早以藝文之英洵更儒學之選  
典朕三禮列在貳卿惠茲一州號為良吏比稽會課之  
法實應陟明之科往服序遷毋忘猷告可

李琳奉使回轉一官

朕弭甲兵之事將永締于鄰歡咨忠信之臣俾再啣于  
王命乃渙出綸之寵用增濡轡之光具官某樂易不流  
純明自得儒者以義為干櫓操尚弗渝君子之性守宮  
庭周旋無懈向篋羽于在位嘗抗旃而出疆侃然專對  
之辭輯是既盟之好茲圖舊德復賁皇華洎四牡之邁  
歸獲五善而重拜亟升禁路既崇獎于積勞序進文階  
又率循于藝制往哉無斃朕則汝嘉可

葛立方奉使回轉一官

朕興五利以冀戢兵之福稽六德以觀出使之能雖聘  
事之有常宣褒恩之可後爾以通才周當世之務以廣  
業濟前人之休自歷清涂寢颺令聞彌綸省闈每能糾  
庶事以參稽明習憲章可以使四方而專對授彼如絲  
之轡煥乎于隰之華展幣旋歸既馳驅之靡憚釋駢加  
勞宜禮樂之未忘爰責陟科用遵彝矩往祗予渙益懋  
厥勞可

梁份奉使回轉一官

琬主結好義早重於睦鄰沃轡揚華禮宜優于遣使恩  
光所被使介惟均爾蚤以令儀服于華綴職在上閭辨  
朝儀而有倫使于四方承君命而不辱比副行人之出  
汜臻聘事之成載念賢勞亟加寵命特升榮於使範俾  
進領於兵團其思恪恭以稱褒渥可

高公海於橫行上轉行一官

朕惟負羈紲之臣依風雲之士既隨才而錄用復考閱

以褒升或畀異恩蓋超常格具官某幹用之裕忠勤不  
渝頃自潛藩隸于武帳赴事功而無缺更歲月以彌深  
忽披奏牘之陳願解贊賓之職載嘉勞閱用錫寵章躡  
升橫列之崇增重武階之舊體吾眷意益懋勤勞

宋鈞奉使回轉官

古之使四方者或取其誦詩三百或貴其行已有恥誦  
詩三百通乎經也是以多專對之能行已有恥謂之士  
也是以有不辱之節朕選使介以修鄰好亦必參于是

而求之爾博雅有文翱翔乎篇籍之圃蓋所謂士之知  
經者均轡而行既以禮遣復命之始可無恩褒一進厥  
官是為彞制益殫才諳以俟甄擢之榮可

海陵集卷十八

欽定四庫全書

海陵集卷十九

宋 周麟之 撰

外制

王循友知建康府

控江山之都會望莫重于陪京撫民卒之浩繁治必資  
於良牧非聲猷之素樹曷寵寄之兼隆以爾雅亮不羣  
威寬並濟夙播儒紳之譽洵更省闈之華司列東銓嘗

羽儀于禁路承流北固方屏翰於名邦嘉善政之流聞  
宜雄藩之就陟任兼留鑰爾典其嚴地有宿兵爾為之  
重懋乃藩宣之績體予眷倚之優

趙不羣除兩浙運副

朕惟漢制以刺史班六條以司隸察三輔今漕臺置使  
實按列城而浙部觀風兼臨近甸任重于古久難其人  
以爾儒術該通吏才敏幼累有郡最蔚為宗英擢從牧  
守之良入授轉輸之寄爾其幹貨儲以裕邦計導德意

而廣上恩使寬不至於吏嫚而事隳嚴不至於政苛而民擾時乃稱職則予汝嘉

章夏除御史中丞

朝廷紀綱之地御史府必得其人天子耳目之官中執法實為之長地嚴則望峻才稱則職修朕考擇于朝幾同弄印久虛乃位蓋俟登賢具官某氣深以醇善不外見行毅而正志乎中庸擢自多冠列之諫省茲日聆其讜論既序冠于爭臣專席南司無以易汝頃朝夕陳善

固已誠而可觀今中外聞風當不繩而自肅往治厥屬  
朕有望焉

宋樸除殿中侍御史

臺綱正則朝廷理今三院御史皆風憲所繫而官望雄  
峻均也朕急賢而用故中司不決旬而遷慎選其人故  
橫榻亦逾歲未補綱舉臺事屬之副端其任固不重哉  
以爾聞譽之廣施于身仁義之晬見于面端靜弗競朕  
所簡知分察六曹直繩無撓肆予命爾正班序于殿中

簪筆赤墀亦云寵矣爾其思所以糾官邪而肅中外稱  
朕意焉

鄭璵章帖並除大理寺丞

獄人之大命王者欲以是槩彝于民不可以威貨為也  
朕嫉鍛鍊之吏懲五過之疵惟時理官靡不慎簡以爾  
璵名閥之彥素明憲章以爾帖儒科之良深達古義皆  
嘗累佐名郡為中都官處煩決疑必有餘裕今予命爾  
丞于廷尉之司聽辭欲其簡孚閱罪欲其審克惟察惟

法時乃之休

都絜除將作少監

朕招徠四方之英，褒采一介之善，列布在位，魚魚盈庭，而猶且博問遐觀，夙夜以求賢為先者，豈有它哉？思人材之衆多，以熙治功也。爾志行馴雅，學術淹貫，安于州縣，義不苟求，自分左符，繇歷數郡，亦未嘗為赫赫名也。邈在遐服，知之者希，邇臣薦聞，亟命召見，占奏詳審，朕甚嘉之，念其資高，不可以庶僚詘也，用徑躋于列監，而

屬之以少匠之事焉肆觀爾能尚有旌擢

喻標除工部郎官陳祖言除比部郎官

文昌設六屬以待天下之才朕未嘗不原省衆能詳試  
而用雖事之繁簡或小異至其為握蘭之選則均也如  
標識度夷粹嘗勇於挂車如祖言器資端清久誦于銓  
調是皆二十年館閣之舊而復用為公朝之光夫起曹  
董繕營比計主鈎覆攝承既久並命為真朕之所期亦  
豈在于工師繩墨之間財賦出納之會哉各懋遠猷毋

忘所學

陳山除祕書省正字

蓬山俊躔昔人號為羣玉府豈徒取典籍之富哉凡殫見洽聞大雅宏達之士曳裾于其間者是皆吾琮璜圭璧也世固有懷寶未售朕求諸和氏之肆而得之以爾有溫純密緻之資韜養以學問而發見于文章名對昕朝嘉爾遠器升之天祿是正祕文尚思琢磨以俟特達之選

潘莘除樞密院檢詳

凡天下之機務總在右府司于柄臣而檢柅于詳覈之官茲其為僚實視宰掾非端靜敏達之士未易居此選也。以爾器尚沈邃長于撥煩曾不以才刃自高每孜孜于厥職自歷樞屬克勤編摩雖為臺郎亦參闕于基命之地練習多矣允宜即真時方弭兵國有成算非恪慎何以與軍政之嚴密非精審何以察吏文之浩繁往其靖恭毋忽幾事

鄧根除江東運判

朕固不欲數易吏令有不待終更而遷者豈樂為是紛  
紛哉才者必用勞者必陟亦視公論何如耳爾之為吾  
股肱羣議者謂有健決彊濟之資可付之以一路剽繁  
折滯昏所優為今江東奧區帥守與部刺史多儒者爾  
乘輅于其間相與究民之利病察吏之惰勤而臨事有  
以緣飾之則其設施無非可觀者往護而漕毋或不祇  
范如圭除直祕閣江西提舉

士大夫重內而輕外蓋仕宦之常情也惟篤于道義者不然在朝廷有志乎為民處遐外不忘乎愛主而朕之待下亦豈有厚薄于其間哉爾二十年蘭臺之英也議論挺挺介然不阿久于投閒在約彌勵今以從臣之薦入對于昕朝而首告朕以惠養斯民之說朕思得一膚使往按江右汝之來也實契朕心寓直石渠其行寵矣外得以紓攬轡之志內不失為登瀛之仙輕重惟均汝

心毋貳

趙善繼除直祕閣

二千石能惠養百姓勸課農桑使其民賣刀買犢斯治之上也若夫繕城壁程土功此雖非循吏之本然能者為之亦可以觀政爾之于贛也是欲營守土之職耳原爾心豈計賞而為之朕以其工築之費未嘗一毫取于民後不告勞事無愆素此非才敏者不能辦可嘉也已不然芸閣高華朕豈以是為賞功之具哉傳曰衆志成城又曰保民以德不以城爾其思所以敷德惠固民心

斯無負于專城之寄

盧奎除湖北運判

朕用人考其素分職因其能凡吏之近民皆不敢忽也  
況持漕節者乎爾歷官于鼎澧荆湖之間有年矣自為  
郡掾為儒官為諸司屬僚以至于刺部典藩往來乎數  
州習熟乎一路幾若居鄉國而長子孫者則其于戶口  
之耗登財賦之廣狹官府之事里閭之情聞之詳得之  
審矣今付汝以舊治屬汝以輸將考閱閱之素則知民

之必安因按澄之能則知吏之必畏朕命惟允往其觀  
功

湖南運判楊邦弼除祕書丞

冊府有丞號為高選與奉常司屬俱不以寺繫之其品  
清也非才望稱是顧可以輕畀哉今天下之英畢集矣  
蘭臺校文石室紬書非一時之魁彥則多士之上游宏  
科之異舉也爾頃以對策預前列而詳試于外曾不得  
窺東壁之光今釋軺車序之中祕尚懋遠業以為超遷

之階

張晟除將作監

朕頃者顧衆俊而躬前席之間得耄髮而興見晚之嗟  
當振滯之云初或褒賢之未至今爾以舊德居省戶以  
通才掌勳書試之兼官綽有餘裕蒞事精審久而益厯  
茲皆劇司豈以優老使其應酢于七司之會孰若雍容  
乎九列之聯朕方斥土木之工省繕營之事時此大匠  
亦為清曹往紓爾勞以備吾用

吳武陵除司封郎官劉燦除司勳郎官楊倓除都  
官郎官

尚書郎懷香握蘭趨走丹陛事任雖殊莫非華選比年  
雖闕員之多而每以他官兼領者慎所與也朕今簡百  
僚之俊拔其尤而用之以爾武陵才粹而清士所矜式  
以爾燦行峻而茂學有典刑以爾倓器敏而通志乎文  
藝並以績用見于踐揚宜類以升置之省戶朕欲屬銓  
曹者無阻格之弊總都隸者有詳整之稱往惟懋哉各

修厥職

劉滎除福建提舉

斂散倉儲國之善政法令明備諸路同之而摘山之贏  
惟閩粵為盛部刺史之節付之非人其可乎以爾穎悟  
之資早以才奮再踐朝著游登郎闈其于臺閣典章儒  
者之事固習矣至若商功利治貨財抑知有所謂本末  
源流者乎今因其請外而試之以刺舉之官汝毋忽焉  
思所以稱

王珪除太常少卿

御史掌風憲太常司禮文風憲所以正朝廷而糾官邪  
禮文所以辨上下而定民志二者未嘗不相為表裏也  
爾在栢寺號稱嚴明察祀事之弗虔劾朝儀之弗謹凡  
所論疏欲人尊君可不謂之知禮者乎惟時曲臺禮所  
自出因使往貳且觀汝于躬行之間不愆于儀爾職斯  
舉

都民望除監察御史

風憲之官皆吾遴選是必由正臣之所薦為公論之所  
歸然後召見以觀其人親擢以定其位詳試以考其能  
授受之間庶乎惟允以爾問學醇正濟之通才義不苟  
求介然有守至其聲實俱懋則雖邈在數千里外朕得  
而知之入對大庭嘉汝遠器今寘之正色之地必能為  
朕明目張膽助振于臺綱此其權輿惟慎以俟

張宗元除將作監

朕獎拔寒素登明選公而又于功臣之後占善能自修

者長育成就惟恐不及焉待用無遺之義也爾世載厥  
問闕于藝文握蘭司輿率職匪懈升之大匠益試汝能  
朕方斥土木之役而省繕營崇朴厚之風而抑淫末惟  
工監事簡官清優游其間足以自養朕命惟允爾毋不  
祇

劉度除太學博士

朕崇建膠庠作成士類首善于此必得博雅君子為之  
師庶幾卓然可觀有以尊道德而厲風化爾南州望士

嘗有志于晁董之科揆厥所聞鬱而彌耀是所謂明古  
今通國體者可使充博士位矣名自侯泮列之儒宮予  
方汝知母倦于訓

逢汝霖除太府少卿依舊湖廣總領

朝廷設總賦之官貫朝序于中而筦利權于外堪其事  
者可無褒陟之恩哉爾賦才敏明練達財計累治劇郡  
所臨有聲向起於閒列在星省念握蘭之已晚旋出領  
於軍儲輸輓以時辦集無缺升貳外府庸旌其勞尚殫

乃心以副褒用

李邦獻除直敷文閣江西運副

朝廷美意寓于人才抑揚之間而行乎賞罰勸沮之外使居之者無怠去之者有光待人以周吾復何媿爾之漕于浙也歲已再更處煩恢然才未克究朕方圖裕民之政俾均惠于下不重內而輕外不泄邇而忘遠茲用命爾易部而使將輸于大江之西序勞而升寓直于六閣之次夫易部所以詳試而序勞所以寵行毋薄此除

益觀來效

王正臣該第一賞轉一官特與轉遥郡刺史

國家類能而授之位信賞以勸其勞各有等差用程庶績凡所為天下公也爾以謹孚之資隸職彤閣夙夜祇慎踐更有年朕方興周室之典禮以文太平復漢官之威儀以訓著位繫爾軒墀之舊備諳典故之詳實掌賓臚克贊朝事揆于優數當得褒遷升之刺符衆論惟允服此明命往其丕欽

知樞密院王綸前任經修仙源積慶圖特轉一官  
朕紹休聖緒膺歷御圖至于議禮考文未嘗不以祖宗  
之法為法矧是寶牒職于司宗叙述仙源昭示萬世告  
成人奏頒賞第功凡所舉行蓋無非本于舊章者朕固  
不得而私也具官某學識純茂優有史才頃儀禁涂與  
典茲事今雖位在樞筦為予股肱前功具存實不可廢  
顧朕方屬汝以本兵之寄倚汝為立武之經惟能審定  
規模務明綱紀如疇昔之精且密則雖一日萬幾亦復

何慮往祇寵命益懋多庸

起居郎王剛中經修神宗寶訓轉一官

仰惟神宗皇帝盛德大業冠冕百王孫謀燕詒萬世是  
式朕欽繩祖武弗敢愆忘爰命輔臣躬率承學之彥相  
與正列其義秩飾厥文著為一代之典奏篇來上歡成  
無疆凡與編摩必加甄賞以爾發策之始為朕所知蓋  
雖起于寒畯之中而能練達國朝典故議論疊疊發明  
為多頃游著庭昉纂丕訓今雖陟在螭陛而恩典不可

有遺膺此序遷益昌所學

楊椿磨勘轉左朝奉郎

任官惟賢效每彰於詳試積日曰閱法蓋許其序遷迺  
眷銓衡之司來登侍從之最宜遵彛制用錫寵章具官  
某早負軼材寢更華貫雍容在位幸若相如之周時靜  
默為心自期揚子之樂道久儀禁路具著賢勞武部聯  
華既資於整暇經帷勸講復賴其論思爰稽會課之書  
式賁懋官之渥往祗予渙尚遠乃猷

李琳磨勛轉左朝議大夫

朕操名器以為天下公德盛者位尊功多者賞厚義所當予雖一歲九遷其官人孰以為過哉況在銓曹具存考法具官某謙慎淳篤古之吉人服采在廷樂於營職擢自少列貳于天官曾未數月間以聘問之勞編摩之績兼上侍從之最增秩者凡三焉綸閣恩書相屬而下禁路增煥縉紳榮之昔正考父一再受君命至於俯俛循牆而不敢安行其共也如是故鼎銘而策書之矧惟

汝心素自謹畏亟拜嘉寵尚無忘乎滋益恭

王仰心磨勘轉左太中大夫

四善諸最皆考法之舊規三歲一遷蓋從臣之優數朕  
大計羣吏允釐百工矧惟持橐之英敢廢懋官之渥具  
官某才猷邃雅識量淵通早敷言而試功能展體以率  
職入居華省朝夕每賴其論思出殿大邦田里不聞於  
愁歎比以甘泉之舊登于瑣闥之嚴屬會課以序勞爰  
疏恩而進秩夫左省闕萬微之會而宗階比千石之優

惟聲望之兼隆則事功之益振勉扶公道祇答寵光

葛立方磨勘轉左朝散大夫

侍從之臣持橐簪筆在朕左右本不以歲月為資尚何  
徇考功課吏之法哉然九官亮工舜有陟典四善分最  
唐優選司邦彞至公朕不敢廢具官某學蘊淵茂自其  
家傳雕龍之文益振於後而游刃所至皆能以辨治見  
稱入掾宰司出將使事進聯天官之貳底績多矣朕方  
使之銓綜人物則較年序進當以汝先夫為官擇人既

因能而授之職積日曰閱又會課而升厥階兼工者以  
待天下之才朕固將為士大夫之勸服我褒命益勤以  
祇

韓仲通進茶鹽法轉官

熬波摘山半天下而可以衣被幅員經制立則弊不滋  
而課益羨顧可後哉具官某明習憲章飾以儒雅理官  
司寇之政得法外意民以不寃則恭訂惠文之書蓋莫  
如汝宜者比師臣奏章以書來上甲乙鱗次井井有倫

誠可昭示萬世其陞華級用旌爾勤

梁汝嘉磨勘轉官

周官馭貴實為八柄之先虞典陟明必限三年之久朕若稽往制恪守彝章儻庸歷之無愆豈陞崇而敢後具官某受材膚敏賦性疏通彈壓推天府之能斷割藹地官之譽粵從均佚傍彭澤以奉崇祠屢沐疏恩裂縉雲而賜錫壤會茲歲課已應邦常其升四品之官仍賁八命之爵往其祗服嗣有寵褒

金陵集卷十九

欽定四庫全書

海陵集卷二十

宋 周麟之 撰

外制

資政殿學士楊愿以本官職致仕

典居留之鑰方有俟於政成乘得謝之車乃遽聞於病  
去爰頒從欲之命以示愍煩之恩具官某周慎自將沈  
明有守早以風槩儀于薦紳陳力於朝嘗贊樞機之事

自  
卷二十一  
剖符于外累書屏翰之勞矧是陪都正須卧治茲以疾  
諗願從里居仍祕殿之榮名守文階之本秩尚務精神  
之嗇往膺福履之將可

龍圖閣學士程瑀轉一官致仕

告猷于內夙陪曳履之聯諗疾于朝俄露挂車之請肆  
茲從欲厥有渙恩具官某以博通經術冠儒科以明習  
憲章歷朝著久於持橐寢登常伯之尊出則擁麾屢上  
藩臣之最望素高乎延閣居方燕於殊庭遽以抱痾力

祈謝事爰錫進階之命式彰歸老之榮勉嗇至和尚綏  
遐福可

資政殿學士何鑄致仕

結綬而登王畿嘗致身於樞密脫冠而謝朝列俄引疾  
於燕閒肆領從欲之恩俾遂養痾之志具官某器度闕  
雅才猷邃明繇華轍之踐揚藹公朝之聞望本兵西府  
恪陪宥密之謀仗節北庭遠稱光華之遣方奉祠而均  
佚忽告老以辭勞仍茲祕殿之除名守爾王官之舊秩

勉親醫砭式介壽臧可

敷文閣直學士吳表臣轉一官致仕

稽閱祕遷方渙出綸之寵抱痾寢劇忽騰解組之章念  
終保於令名宜趣加於優禮具官某身老才壯學成行  
尊居朝素識其履聲出守累煩乎卧治甫就聞於祠宇  
俄謝病於里居服我閔勞之恩何恙不已錫茲告老之  
秩以榮其歸勉頤精神尚迪寵祿可

資政殿學士程克俊守本官職致仕

惟陳力就列之臣不能則止方招賢聘能之世以病而歸此當饋之所深嗟況有司之於常典寓此恩意敷于贊書具官某器閔以周學博而邃居翰墨之任則文施於典冊贊樞機之職則知達於謀謨比自燕閒從吾額名服在政路不數月而丐閒櫻于痾瘵僅逾年而告老雖事功之莫著豈寵渥之能忘惟文階為寓祿之榮名而祕殿乃隆儒之美職以此茂命賁之終身尚其壽康副我優獎可

中書舍人趙遠轉一官致仕

蜀士以文章名天下代不乏人比年以來材俊輩出朕嘗親拔尤異首冠儒科深知其人擢在禁近遽以疾去寧不憮然具官某清純澹夷雅有特操行不為表襮學不務空言東觀石渠備聞所守蓋其靜而不競如野鶴之在雞羣涅而不緇如清冰之出大壑遂自載筆升之綸闈方將大放厥辭遠追顛壘之作而迫於危疾終莫可留進陟文階仍班從索以此謝事庶其或瘳可

張綱特轉一官致仕

帝王以爵祿厲世尤褒尚於廉隅君子以明哲保身貴  
克全其志節眷言壽俊祈謝官榮爰頒上印之恩用賁  
出綸之命具官某才高一代望貫三朝學得其宗蓋若  
總龜之聚器全於樸自同彛器之陳早持橐於在廷既  
脫冠而居里爾則曰宦成名立將嘯詠於窮年朕以其  
齒哉行尊可諮詢於大政復自田野致登廟堂既分共  
理之符旋工丐歸之蹟亮由衷之懇憫申從欲之褒榮

廣德垂安車宜子孫之永耀君章還舊宇想蘭菊之叢  
生往祇寵光尚保眉壽可

孟忠厚加太保致仕

人臣盡瘁咸榮解紱之歸國典崇嫺或重面槐之拜眷  
惟者括舊服邇聯既引疾以乞身宜懋官而進律具官  
某持身淑慎迪德忱恂業承世胄之華躬習儒風之美  
蚤飈休問預列貴游考其素則中外之備更求於今則  
親賢之莫二運籌而登邃幄嘗叅宥密之謀露冕以殿

名藩專尚中和之政偃革有載橐之助憇棠多勿翦之  
思比懷綬以過都使攷旌而留闕奉內祠之香火冀相  
親於朝謁之間領中祕之圖書使自佚於事為之外不  
圖抱疾遂丐辭榮諒懇請之由衷宜眷私之從欲王封  
錫胙久兼戟纛之華帝保陞班用賁紘綬之寵茲為異  
數蓋示隆恩噫野王之為三公以行能之可尚樊宏之  
冠四姓惟禮義之能終往焉垂車尚或勿藥可

蕭振轉一官致仕

朕以全蜀重寄屬之於栢艾敏達之臣宿望所臨民皆  
信愛得人如是謂自此無西顧憂矣而病亟驛聞忽奏  
乞歸之記朕雖欲不許其去胡可得哉具官某才全器  
周為國之幹老於侍從稱有壯猶不數年間再臨益部  
朕以其信孚惠徧功著職修方頒璽書褒表治效以為  
二千石能共理之勸書贊具矣而諗疾之章遽騰上印  
不留何去之果朕固已失長城之倚爾豈不念甘棠之  
思增秩賜金更申茂渥尚扶沈痼祇寵以歸可

康執權除龍圖閣直學士提舉在外宮觀

人臣之義雖盡瘁而不辭王者之恩以閔勞而為重眷  
予者德典是劇藩念當卹老之朝宜有賜休之寵具官  
某奮由兩學仕歷三朝齒宿意新未厭韋編之讀宦成  
名立早勞荷橐之歸迨公道之復開惟舊人之圖任雖  
云已老尚可解蘭縛塵纓孰謂無能方將剖竹守滄海  
念彼既憊之力分予共理之憂使其鞅掌於簿書之間  
孰若優游乎泉石之外茲為得計可以全生內閣崇名

爰就加於峻直真臺寵祿亦足助於常珍往祇渙恩尚  
保眉壽可

徽猷閣直學士向子諲贈四官

乞身於朝早遂挂車之適書訃于策亟頒加祿之恩雖  
舊章之是循亦眷禮之攸著具官某明彊多識淹博有  
文儀于禁涂亞六卿之重位懿彼戚畹邁四姓之顯人  
退不待年勇於謝事雖故林之息駕仍延閣之舊班自  
樂餘齡焉問桑榆之迫奄歸厚夜徒傷蘭菊之存惟命

秩之躡陞示寵光之追賁爽靈如在異數其歆可

蕭振上遺表特贈四官

蜀帥之雄今為天下冠朕深咎往昔委非其家用不  
寧衆怨且感既得良二千石之舊民曰蘇矣未再歲而  
失之朕心惻焉茲有愍典具官某延閣之老備更險夷  
頃在朕前知畧輻輳分虎于外告猷益嘉卧護四川卓  
然有異等之效甫昇褒命而遽革聞于朝卒不可為遺  
表來上慨念風采盡傷何窮朕惟爾之再入蜀也蜀父

老扶杖來迎歡呼之聲數百里不絕今而反旆乃以喪  
行思之者同墮淚於峴首之碑祀之者當侑食於文翁  
之廟追寵有命尚其知歆可

敷文閣直學士致仕蘇符贈官

朕望喬木而思世臣覽裳華而念君子偉近代有儒門  
之盛三英粲兮訪諸孫於從索之聯一鑑亡矣爰盼愍  
穉用寄追褒具官某擅雕龍之文蘊凌雲之氣善繼厥  
祖不隕其聲方延閣升班所冀得朝夕論思之益而使

藩圖任庶幾聞中和宣布之詩忽焉挂神武之冠茲又  
奏茂陵之札典刑垂盡不復見於老成議論具存猶可  
想其風烈增秩四等用光九原惟英識之未淪尚寵章  
之斯服可

洪興祖特贈直敷文閣

朕寅奉先猷襲藏邃閣揭為寵職以待天下之賢有勞  
者況士之通經博學沈涵斯文餘力及于當代之典而  
太史因之以成書者乎爾閎辯洽聞淹貫今古頃在庠

序業精于勤凡先朝之睿文無不手自纂綴沆以奏篇之備遂新廣內之儲朕嘗頒賞于朝而爾獨以文致抵臯齋志以沒時論寃之爾子有陳朕所深惻追加寓直之命實豈不稱哉尚其有知服此休寵可

万俟卨贈少師

任者德以贊元遽失秉鈞之助考卹章而歸襁敢忘加緋之封曩者股肱之虧迨茲寃宥之事爰盼異數曲示終恩具官某學廣而聞多行高而能鉅氣全不撓凜如

松柏之後凋識達未形綽有著龜之先見早疇宿望共  
挈宏綱踐揚風憲之司入贊機衡之地雖杓鑿方圓之  
或異少屈壯圖然棟梁偃植之有時卒歸大用名從選  
服來陟近司予欲建大中以承天心急命相代工之舉  
爾能總衆職以稱朕意繼同心輔政之聲聞闕至公調  
娛庶務未究經綸之蘊不圖疾疢之餘謂微爽於節宣  
乃奄聞於淪謝罷朝興愴深嗟一鑑之亡錫爵追榮進  
位三槐之亞既全體貌用極哀榮噫涓館而賜韋賢莫

遂垂車之樂轂瓜而莫如晦可量當饋之思尚冀有知  
以光不朽可

孟忠厚贈太傅

求勲戚於故家有惻鑑亡之念究哀榮於舊典無加衮  
斂之文爰錫贊書式光遺範既以極始終之眷遇又將  
慰中外之懷思具官某德盛而能謙位高而率禮溫純  
無玷內全璞玉之資儉約不渝終守素絲之節久以縉  
紳之重望席茲將相之多儀朕優寵戚藩載稽后族於

此念昭慈之懿烈宣惟宣永泰之休光扶王室於艱難  
功在十人之右飭私門以法度禮行四姓之先矧是近  
支有如名傑以又政則為樞衡之舊以偃藩則稱岳牧  
之賢近渴見于儀形甫入趨於表著人所望者將庸建  
於上公天實為之不憚遺於一老未賁垂車之寵已聞  
易箚之言節旄既授於真王黻冕更升於公傅噫富貴  
所以長守由一膏之不聞福祿至於永終諒九原之無  
憾詔幽甚寵逝魄其歆可

葉夢得贈官

朕惟先朝之臣居多碩學之士蓋嘗拔尤而用靡慙求  
舊之言其或得正以終可後追榮之典具官某蚤飛雋  
譽亟踐顯途有詞華以挾王庭有經術以飾吏事曩陪  
朕於經綸之始見勤勞之備宣逮致仕於疲曳之餘復  
探討之稱篤何頃罹於艱棘乃遂底於淪亡緬想儀形  
徒有茂陵之藁顧瞻郡國第深子產之思茲匪厚於恩  
微曷以昭於愍飾用卽建旌之舊俾偕亞保之儀繫爾

有靈尚其克享可

皇太后封贈

故曾祖冀王章舜臣追封吳王

伸天下之養孝莫大於寧親舉國南之禮禮蓋嚴於饗  
帝朕仰祇慈訓丕歲上儀迎日之長用拜甘泉之貺受  
天之祐以承長樂之歡宜崇外氏之恩式賁曾門之寵  
皇太后故曾祖某躬有嘉德善無近名立身不愧於前  
修筮仕已期乎後大百年茂緒果符沙麓之祥一等真

王屢享衮衣之禮徒封大國庸渙新恩尚繫爽靈服我  
追冊可

故曾祖母冀國夫人段氏贈魏國夫人

朕肸飾鸞路紛陳羽林舉三歲之上儀秩一純之嘉薦  
風馬來下樵蒸配藜神人祇歡中外禔福允賴慈闈之  
慶益隆先世之褒皇太后故曾祖母某氏秉心靚柔率  
禮恭下循二南之化嘗播美於方江卜三世之昌遂發  
祥於在渭爰侈追封之典用昭丕績之休以魏地之新

奮易冀方之舊賦泉塗雖閔尚識寵靈可

故祖

朕執圭幣以事上帝煇管蕭以延四方饗洽誠陳既昭  
假爾德洋恩普浥布濩之矧若外親之崇率其祖義之  
重爰因慶賚趣責恩書皇太后故祖某潛德韜光抱冲  
履素修其天爵雖於時無高密之勳詒厥孫謀顧乃後  
有和熹之慶爰霑漏泉之澤申加刻琰之章載瞻瞻周原既  
啟爾宇徙宅曲阜用安乃封追命有加承休彌渥可

故祖母

大事在祀莫重於郊至誠感神惟馨匪稷朕款泰壇而  
修報坐宣室以受釐嘉與寰區茂迪滂洋之福深惟母  
族素陶仁善之風亟下綸書追崇祖配皇太后故祖母  
某氏徽柔有裕惠順無違飭身為姻黨之師種德厚子  
孫之蔭嗣有娥嬖之女蔚為馬鄧之門自六駝之旋歸  
日嚴大養方四圭之絜祀天錫鴻禧爰增象服之華載  
侈國田之沃淑靈不昧命數其歆可

故父

昔鄧氏荷白河之澤活民命者數千漢家飾觀津之藏  
置園邑者三百惟積仁而深厚乃蒙福而顯融此天道  
之必然宜國章之有煥皇太后故父某敏德為行終身  
安仁陰功能大其一門慶系遂高於四姓是鍾文母以  
佑我家朕方考思齊之詩用欽承於溫清采長樂之頌  
期永介於壽臧屬元祀慶條之頌念外家禰廟之重金  
印盤綬載更王社之封衮衣繡裳有赫台躔之冠尚期

金史卷之二十一  
卷二十一  
永饗式慰時思可

故母

朕謹東朝之奉崇外族之思念太任承京室之徽實鍾  
摯氏之德而周南著后妃之本必有葛覃之思爰錫麗  
鴻之禧以光聖善之懿皇太后故母某氏抱聰達之識  
執端和之儀早儲夢月之祥茂毓倪天之質兆晉史之  
卜已彰聖女之符飾靈文之園追用小君之禮方盼祭  
澤游舉褒章兩社疏封式循於舊典六珈備服增煥於

雕軒逝魄有知垂休無斁可

少師錢忱封贈

故曾祖

朕執犧牲以事宗廟修祀報以降上神樂徧禮周卜三  
靈之並貺仁滂施厚嘉四極之爰轉矧予媿戚之門敢  
後褒封之律具官某故曾祖某業光世閱譽振儒英袞  
鉞之貴萃於身枝葉之蕃繼於後屬備成於熙事宜申  
錫于渙恩已賁上公之圭更荒大國之履綬服領寵尚

其饗承可

故曾祖母

朕絜染酌之具嚴郊宗之祠黼繡周帷陟紫壇而拜貺  
樵焜蒸上贄青昊以升煙誕敷靈時之釐普洽漏泉之  
澤具官某故曾祖母某氏柔風有裕令德是躬能同黽  
勉之心助啟燕詒之慶今予懿近實爾裔孫肆茲欽燎  
之成與被慶條之錫易荒大國增賁卹章尚惟淑靈歆  
懌徽寵可

故祖

朕歷天元之吉旦舉郊類之上儀百辟駿奔展采而錯  
事高靈下墮降嘏而產祥思與茂嫺共膺丕祉爰侈慶  
條之渥用申祖服之褒具官某故祖某早以英材列於  
從索身既踐乎華轍慶復覃於令門上表疏封已光累  
祿用邦錫履更易舊封英爽何之尚歆寵數可

故祖母

禮必本于天所以推尊而配祖惠必及于下所以斂福

而錫民念建戚之丕彛著褒先之令典自義而率厥恩  
有加具官某故祖母某氏以柔風宜厥家以善訓貽于  
後粵有良嗣為予舊嫻嘗忝九棘之崇兼擁六族之重  
屬郊釐之誕布宜湯賦之益豐遺靈有知歆我休命可

故父

朕惟聖人有饗帝之能天降之祐君子有篤親之念民  
興于仁迺揆靈辰親祠陽時洎涓成而敷慶因教孝以  
廣恩眷惟戚閑之英宜賁禰宮之渥具官某故父某處

躬端亮迪德粹和早以簪纓望高於華胄兼茲鉞鼂位  
重於副車眷乃嗣賢復叅差棘肆予上祀膺是蕃釐爰  
申先世之褒載錫大邦之胙沒而不朽寵命其承可

故妻

朕迎日至以踐長即壇陔而歲事登侑二后殿延八鄉  
孝奏天儀事昭福舉迺眷茂親之懿宜加故室之褒具  
官某故妻某氏迪四行之芳猷播六嫔之惠問善佐君  
子聿興慶門雖早闕於韶華宜申榮於祿服迨布陽郊

之慶改疏大國之封尚惟淑靈歆此徽寵可



海陵集卷二十